

## **Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat nr. 22, 23. december 2013-imeersoq Atuuissimasoq (Historisk)**

Efterskolit pillugit Inatsisartut inatsisaanni nr. 13-imi, 5. december 2008-meersumi § 20, imm. 2 Inatsisartut inatsisaatigut nr. 17, 3. december 2012-imeersukkut allanngortinneqartoq naapertorlugu makku aalajangersarneqarput:

### **Kapitali 1**

#### Tapiissuteqariaatsit tapersiissutillu

**§ 1.** Aningaasanut inatsimmi aningaasaliissutigineqartut iluanni Ilinniartitaanermut Naalackersuisoqarfik Danmarkimi efterskolimiinnermut atatillugu makkununga tapiissuteqarsinnaavoq:

- 1) Angajoqqaat akiliutaannik appartitsinissamut.
- 2) Ilinniarnep aallartilerneranut ilinniarunnaarnermullu atasumik Kalaallit Nunaannit utimullu ilinniartup angalaneranut,
- 3) Ilinniartup angalanerminut atasumik pisariaqartumik unnuisariaqarneranut,
- 4) Ilinniartup angalanerani pisariaqartitsineq naapertorlugu nerisaqarneranut.
- 5) Qanigisat napparsimarulunnerannut toqunerannulluunniit atasumik Kalaallit Nunaannut utimullu ilinniartup angalaneranut.
- 6) Timikkut tarnikkulluunniit innarluutillip taassumalu attaveqaataata imaluunniit ilaqutaata ataatsip misissuiartorlutik angalanerannut.
- 7) Ilinniartunut immikkut pisariaqartitsisunut ikiorsiissutinut, tak. § 3.

Imm. 2. Qanigisatut, tak. imm. 1, nr. 5, paasineqassapput qatanngutit, aapparisaq, qitornat, angajoqqaat aamma aanaa/aataakkut. Immikkut ittumik pisoqartillugu Ilinniartitaanermut Naalackersuisoqarfiup inuit allat qanigisatut isigineqarnissaat akuersissutigisinaavaa.

**§ 2.** Misissuiartorluni angalanermut, tak. § 1, imm. 1, nr. 6, tapiisoqartarpoq, ilinniartup immikkut ittumik ajornartorsiutaanut efterskolip sorliup naapertuunnerpaanerani paasiniaanissamut.

Imm. 2. Misissuiartorluni angalanermut ilaassaaq ilaqutariinnut attaveqaataasinnaasunut pulaarneq, ilinniartup efterskolernerani suleqatigiinnissamut tunngatillugu ataatsimoorussamik ilimagisaasut qulaajarnissaat siunertaralugu.

**§ 3.** Ilinniartunut immikkut pisariaqartitsisunut, tak. § 1, imm. 1, nr. 7, ikiorsiissutinut ilaapput ingerlassat ilinniartup immikkut pisariaqartitaanik aallaaveqarlutik ilinniartup iluatsitsisumik efterskolimiinnissaanut tapertaasinnaasut. Ikiorsiissutit suussusissaat annertussusissaallu

Ilinniartitaanermut Naalackersuisoqarfimmut qinnuteqartoqareerneratigut aningaasaliiffigineqartassapput.

§ 4. Aningaasanut inatsimmi aningaasaliissutaasut iluanni Ilinniartitaanermut Naalackersuisoqarfik ilinniartut naalackersuisoqarfiup aaqqissugaanik angalasut Københavnimut apuunnerminni isumagineqarnissaannut, kiisalu efterskolernerup aallartinneranut atasumik ilisarititsilluni piareersaallunilu pikkorissaanernik ingerlatsinernut aningaasartuutunik matussusiisinnaavoq.

§ 5. Aningaasanut inatsimmi aningaasaliissutaasut iluanni Ilinniartitaanermut Naalackersuisoqarfik makkununga akiliussigallarsinnaavoq:

1) Ilinniartut efterskolit ammanerisa avataanni ilaqutariinnit attaveqaataasunit allanilluunniit angajoqqaanit taamaaliornissamut pisinnaatinneqarsimasunit isumagineqarsinnaanngitsut inissinneqarallarnerinut.

2) Taamaattinnermi akiliummut, tak. § 18, imm. 1, taamaattorli annerpaamik 8.000 kr-nik.

Imm. 2. Imm. 1 malillugu naalackersuisoqarfiup aningaasartuutai tamatuma kingorna ilinniartumut angajoqqaatut oqartussaassusilinnut akiligassanngortinneqassapput.

§ 6. Ilinniartitaanermut naalackersuisoqarfiup aningaasaliissutaasut iluanni Danmarkimi efterskolini ilinniartut tamarmik ilinniarnissamik ilitersorneqarnissaannut aningaasartuutit akilissavai.

## Kapitali 2

### Tapiissutit annertussusaat

#### Efterskolimiinnerup akilernissaanut tapiissutit

§ 7. Efterskolimiinnerup akilernissaanut tapi tassaavoq kr. 281 sapaatip-akunneranut, taamaattoq tak. imm. 2 aamma § 8.

Imm. 2. Ilinniartunut efterskolernermik nalaani Danmarkimi efterskolertunik qatanngutilinnut ilinniartup pineqartup saniatigut qatanngutaanut efterskolertunut tamanut efterskolernermut tapi tassaavoq kr. 422 sapaatip-akunneranut.

§ 8. Angajoqqaatut oqartussaasut efterskolernissap aallartinnera ukiunik marlunnik sioqqullugu ukiumut kr. 280.000 qaangernagit akileraaruteqaataasussanik ataatsimut isertitaqarsimappata, § 7 malillugu tapit saniatigut, angajoqqaat akiliutissaannut apparsaatissamik immikkut tapiisoqassaaq, aningaasanut inatsimmi aningaasaliissutit aalajangiussat iluanni.

Imm. 2. Ilinniartut imm. 1 naapertorlugu qinnuteqareernikkut tapiiffigineqarsinnaatitaassapput, angajoqqaatut oqartussaasut qinnuteqarnerup nalaani ataatsimoorlutik isertitaat ima apparsimatigippata imm. 1 naapertorlugu tapiiffigineqarsinnaalerlutik. Qinnuteqaammut maannakkorpiaq isertitat pillugit uppersaatit ilanngunneqassapput, inaarutaasumik nalunaarusiaq

kingulleq atorlugu, taamatullu qinnuteqarneq sioqqullugu qaammatini kingullerni pingasuni isertitarisimasat uppersaataat imaluunniit qinnuteqarneq sioqqullugu qaammatini kingullerni 3-ni isertitanut uppersaataat naammattut allat atorlugit.

Imm. 3. Tapiissutit annertussusissaat naatsorsorneqassaaq qinnuteqartut imm. 1-imi piumasagaatinik piviusunngortitsisut amerlassusaat tunngavigalugu, imaluunniit imm. 2 naapertorlugu tapiissuteqartoqarluni, aningaasaliissutit annertussusiannut sanilliussamik. Annerpaamik tapiisoqarsinnaavoq angajoqqaatut oqartussaasut namminneq akiliutissaat sapaatip-akunneranut 300 kr-nik minnerusussaajunnaarlugu.

Imm. 4. Ilinniartut imm. 1-imut aamma imm. 2-mut ilaasut aningaasaliissutit tamarmiusumik atornissaannut naammangippata, aningaasaliissutit sinneri agguanneqassapput ilinniartunut angajoqqaatut oqartussaasui efterskolernissap aallartinnera ukiunik marlunnik sioqqullugu kr. 280.000-it aamma 340.000-it akornanni akileraaruteqaataasussamik ataatsimut isertitaqarsimasunut.

Imm. 5. Angajoqqaatut oqartussaasut avissimappata averusersimappataluunniit, angajoqqaatut oqartussaasup meeqqap najugaqarfigisaata akileraaruteqaataasussamik isertitai imm. 1, 2 aamma 4 naapertorlugit tapiissutit annertussusissaannik naatsorsuinnermut tunngavigineqassapput.

Imm. 6. Angajoqqaatut oqartussaasoq ilinniartup najugaqarfia inooqateqarpat, inooqataasup akileraaruteqaataasussamik isertitai imm. 1, 2 aamma 4 naapertorlugit tapiissutit annertussusissaannik naatsorsuinnermi ilaatinneqassapput, qinnuteqaateqarneq ukiumik ataatsimik sioqqullugu aappariit katissimappata imaluunniit katissimanermit assingusumik inooqatigiissimappata.

Angalanerit akilernissaannut, ineqarnermut nerisaqarnermullu tapiissutit

**§ 9.** Ilinniartup angalaneranut aningaasartuutitut, tak. § 1, imm. 1, nr. 2 aamma 5, tapit tassaapput angallassissutitut tamanut atuuttunut akikinnerpaanut aningaasartuutit tamarmiusut.

**§ 10.** Misissuiartorluni angalanerit, tak. § 1, imm. 1, nr. 6, tapit tassaapput Danmarkimut utimullu pulaarfiillu akornanni angallassissutitut tamanut atuuttunut akikinnerpaanut aningaasartuutit tamarmiusut, taamaattoq timikkut tarnikkulluunniit innarluutilimmut ingiallortaanullu ataatsimut annerpaamik katillugit kr. 30.000.

Imm. 2. Ilinniartitaanermit Naalackersuisoqarfiup imm. 1-imi aningaasanut killigititap qaangerneqarnissaa immikkut akuersissutigisinnaavaa, tamanna pissutsinik immikkut ittunik tunngaveqarpat, tamatumunnga ilanngullugu najugaqarfiup sumiiffia pissutigalugu angalaneq annertuumik akisunerulersimassappat.

**§ 11.** Ilinniartup angalanermit atatillugu pisariaqartumik unnuisariaqarnerit tapiissutit aningaasartuutit tamakkiisumik akilernerneqassapput, tak. § 1, imm. 1, nr. 3.

Imm. 2. Angalaneq ilinniartup pisuussutiginnisaanik allannngortariaqalersillugu tassannaannartumik ineqartitsinissaq pisariaqalissappat, ineqarfissaq aningaasartuuteqarnissarlu inissiineq sioqqullugu ilinniartitaanermit naalackersuisoqarfimmit akuerineqaaqassaaq.

**§ 12.** Ilinniartup angalanermit atatillugu pisariaqartumik nerisaqarnissaanut tapiissutit, tak. § 1, imm. 1, nr. 4 tunniunneqartarput najugaqarfigisami nerinnermit allagartatut.

Imm. 2. Ineqarfigisaq nerinermut allagartanik tigusineq ajorpat, nerisaqarnermut tapiissutit tunniunneqassapput, angalareernermi aningaasartuutigisimasanut uppernarsaatinik tunniussisoqarpat nerinermullu ataatsimut kr. 100 tapiissutaassalluni.

Imm. 3. Angalanerup ingerlanerani ilinniartup pisuussutiginnngisaanik allannguisoqarneratigut nerinissaq pisariaqalersimappat, nerisaqarnermut tapiissuteqartoqassaaq angalareernermi aningaasartuutigisimasat uppernarsaatinik tunniussisoqareerpat, nerinermullu ataatsimut kr. 100 tapiissutaassalluni.

### **Kapitali 3**

#### Tapiissutisinissamut piumasaqaatit

**§ 13.** Tapiissuteqarnissamut makkua piumasaqaataapput:

- 1) Ilinniartuq aamma ilinniartumut angajoqqaatut oqartussaataasut efterskolimiinnerup aallartinnerani Kalaallit Nunaanni najugaqavissuussapput efterskolimiinnerullu aallartinnera sioqqullugu sivikinnerpaamik ukiuni ataatsimi Kalaallit Nunaanni najugaqavissuusimassallutik. Kalaallit Nunaata avataani najugaqarnertut naatsorsuutigineqanngillat, taamaallaat ilinniarnissaq isumaginninnerluunniit pissutigalugit Kalaallillu Nunaanni oqartussat peqataaffigisaanik najugaqarnerit,
- 2) Ilinniartuq efterskoliimiinnerup aallartinnerani ukiuni arfineq-pingasuni atuarsimassaaq imaluunniit 14-inik ukioqalereersimassalluni, 18-inillu ukioqalereersimassanani,
- 3) Ilinniartuq efterskolimi Danmarkimi ilinniartitaanermut ministerimit akuerisaasumi ilinniartussatut akuerineqarsimassaaq, tak. § 14. Ilinniartuq angerlarsimaffiup avataanut inissitaq, tak. § 20, efterskolimi Danmarkimi oqartussaasut meeqqanik inissitanik ilinniartoqarsinnaasutut akuerisaanni ilinnialersinnaanerminnik akuerisaasimassapput, tak. § 14.
- 4) Ilinniartuq efterskolimiinnermini angajoqqaatut oqartussaataasut toqqagaanik Danmarkimi ilaqtariinnut atassuteqassaaq, tak. § 15,
- 5) Ilinniartuq siusinnerusukkut efterskolernissaminut tapiiffigineqarsimassanngilaq, taamaattoq tak. imm. 6.
- 6) Atuartuq pillugu atuarfik oqaaseqaateqassaaq, tak. § 16.
- 7) Tapiiffigineqarnissamik qinnuteqaat piffissaq eqqorlugu tunniunneqarsimassaaq, tak. § 23.

Imm. 2. Ilinniartitaanermut naalakkersuisoqarfiup immikkut pisoqartillugu imm. 1, nr. 1-imi najugaqarnissamik piumasaqaat sanioqqussinnaavaa, tamatumunnga ilanngullugu ilinniartuq angajoqqaavilu ukiuni arlalinni Kalaallit Nunaanni najugaqarsimappata.

Imm. 3. Ilinniartitaanermut naalakkersuisoqarfiup immikkut pisoqartillugu ukiuni 8-ni atuarsimanissamik piumasaqaat aamma ilinniartup 18-inik ukioqalersimannnginnissaanik piumasaqaat sanioqqussinnaavai, tak. Imm. 1, nr. 2, tamatumunnga ilanngullugu ukiut 8 ataallugit atuarsimaneq atuartup klassimik alluisimaneranik peqquteqarpat, ukioqqortuallaarnerlu atuartup klassimik uteqqiisimaneranik allamilluunniit peqquteqarluni atuarnermi kinguaattoorsimaneranik peqquteqarpat.

Imm. 4. Ilinniartitaanermut naalackersuisoqarfiup immikkut pisoqartillugu imm. 1, nr. 5-imi siusinnerusukkut tapiiffigineqarsimanginnissamik piumasaaqat sanioqqussinnaavaa, tamatumunnga ilanngullugu ilinniartuq nammineq pisuussutiginnisaminik siusinnerusukkut efterskolernerminik unitsitsiinnarsimappat imaluunniit naalackersuisoqarfiup nalilerpagu efterskolernerup nanginnissaa ilinniartup ilinniaqqinnissamut periarfissaqalernissaanut pingaaruteqarlunnartuq.

Imm. 5. Ilinniartitaanermut naalackersuisoqarfiup immikkut pisoqartillugu imm. 1, nr. 7-imi piffissaq eqqorlugu qinnuteqaatip tunniunneqarsimanissaanik aalajangersagaq sanioqqussinnaavaa, tamatumunnga ilanngullugu kingusinaarneq qinnuteqartup pisuussutiginnisaanik peqquteqarpat.

Imm. 6. Ilinniartunut inunnut annertuumik innarluutilinnut ikiorsiisarneq pillugu malittarisassanut ilaasunut, imm. 1, nr. 5 apeqqutaatinnagu ukiut pingasut tikillugit tapiisoqarsinnaavoq.

Imm. 7. Ilinniartitaanermut Naalackersuisoqarfik tapiinissamut tunngatillugu piumasaaqateqarsinnaavoq, tamatumunnga ilanngullugu ilinniartup ilisarititsilluni piareersaallunilu pikkorissarnermut peqataanissaa, tak. § 4, imaluunniit ilinniartut immikkut perorsaanikkut pisariaqartitsisut efterskolernerminnut atatillugu ikiorsiiniutinut peqataanissaat, tak. § 3.

**§ 14.** Efterskolimi akuerisaasumi ilinniartussatut akuerisaaneq uppersarneqassaaq tamanna pillugu efterskolip atsiukkamik allagaqarneratigut.

**§ 15.** Angajoqqaatut oqartussaataasut ilaqutariinnik atassuteqarfissanik toqqaasimanagerat, tak. § 13, imm. 1, nr. 4, angajoqqaatut oqartussaataasut aamma ilaqutariinnik atassuteqarfigineqartussanit atsiorneqartumik nalunaaruteqarnikkut uppersarneqarsimassaaq. Ilinniartitaanermut Naalackersuisoqarfimmit tamatumunnga atugassanngorlugu nalunaaruteqarnissamut immersugassiaq atorineqassaaq.

**§ 16.** Atuarfiup atuartuq pillugu oqaaseqaataa, tak. § 13, imm. 1, nr. 6, imaqassaaq atuartup inuttut, inooqatigiissutsikkut ilinniakkatigullu pisinnaasamigut killiffiisa allaaserinerannik. Oqaaseqaat immersugassaaq naalackersuisoqarfimmit suliarineqartuq atorlugu suliarineqassaaq.

**§ 17.** Ilinniartuq efterskolip aallartinnerani takkutinngitsoorpat tapiissuteqartarneq unitsinneqassaaq.

Imm. 2. Ilinniartitaanermut Naalackersuisoqarfiup imm. 1 sanioqqussinnaavaa, ilinniartup efterskolip aallartinnerani takkutinngitsoornera pissutsinik immikkut ittunik akuerineqarsinnaasunik peqquteqarsimappat, tamatumunnga ilanngullugu tamanna ilaqutariinni peruluttoqarneranik angallannermiluunniit pissutsinik ilinniartup pisuussutiginnisaanik peqquteqarpat.

**§ 18.** Efterskolimiinneq maanaanaq taamaatinneqarpat tapiissuteqartarneq ullormit taamaatiffimmiit unitsinneqassaaq. Efterskole taamaatereernerup kingorna piffissami aalajangersimasumi efterskoliiminnerup akilerneqarnissaanik piumasaaqarpat (taamaatinnermi akiliut), tapiiffigineqarnissamik pisinnaatitaaffik piffissami tassani pigiinnarneqassaaq, taamaattorli annerpaamik sapaatip-akunnerini 4-ni.

Imm. 2. Angerlamut angalanermut aamma pisariaqartumik unnuiffissanut nerisaqarnermullu aningaasartuutinik akiliunneqarsinnaaneq taamaallaat atuutissaaq, ilinniartuq angerlannginnermini Kalaallit Illuutaannit efterskolimut attuumassuteqartumit aqqissuunneqartumik oqaloqatigineqaaqarsimappat. Oqaloqatigiinnermi qularnarneqassaaq, ajornartorsiutinut

uniinnarnermut patsisaasunut aaqqiissutaasinnaasut tamarmik misilinneqarsimanissaat, tamakkununga ilanngullugit ilinniartunut ataasiakkaanut ikiorsiissutit, tak. § 1, imm. 1, nr. 7. Oqaloqatigiinneq ilinniartup efterskoliani pissaq, ilinniartup efterskolernerminik unitsitsiinnarluni nalunaaruteqarnerata kinguninguatigut. Oqaloqatigiinnermut peqataassapput Kalaallit Illuutaanni sulisoq, efterskolimi sulisoq, ilinniartoq ilinniartorlu 18-it inorlugit ukioqarpat angajoqqaatut oqartussaataasut imaluunniit ilaqtariit ilinniartumut attaveqaataasut.

**§ 19.** Ilinniartitaanermut Naalackersuisoqarfik tapiissutit utertinneqarnissaannik piunasaqaateqarsinnaavoq, tapiissutit siunertanut akuersissutigineqartunit allaanerusunut atorineqarsimappata.

## **Kapitali 4**

### Qinnuteqarnermi periutsit

Ilinniartut annertuumik innarluutillit aamma ilinniartut angerlarsimaffiup avataanut inissinneqarsimasut pillugit immikkut ittut

**§ 20.** Ilinniartunut inunnut annertuumik innarluutilinnut ikiorsiisarneq pillugu malittarisassanut qaqugukkulluunniit atuuttunut ilaasunut aamma ilinniartunut meeqqanik inuusuttunillu ikiorsiisarneq pillugu malittarisassat qaqugukkulluunniit atuuttut naapertorlugit angerlarsimaffimmik avataanut inissinneqarsimasunut tapiissutit aatsaat tunniunneqarsinnaapput, efterskolernissaq ilinniartup kommunerisaani isumaginninnermi oqartussaasunit akuerineqarsimappat.

Ilinniartut immikkut perorsaanikkut ikorfartorneqarnissamik pisariaqartitsisut pillugit immikkut ittut

**§ 21.** Ilinniartut Danmarkimi efterskolernerminik naammassinissaanut immikkut perorsaanikkut ikiorserneqarnissamik pisariaqartitsisut taakkulu angajoqqaatut oqartussaasui, kommunerisaminni efterskolimut qinnuteqarnissaq pillugu ilitersortissapput, ikiorsiissutinik pisariaqartitsisoqarnerata qulaajarneqarnissaa siunertaralugu.

Ilinniartunut tamanut nalinginnaasumik atuuttut

**§ 22.** Ilinniartunut § 20-mi pineqanngitsunut tunngatillugu angajoqqaatut oqartussaasut namminneerlutik efterskolimut akuerisaasumut qinnuteqassapput.

Imm. 2. Ilinniartup efterskolimi akuerisaasumi ilinniartunngorsinnaaneranik nalunaarut aamma ilaqtariinnit attaveqaataasartussanit uppersaasut pigineqalerpata, Namminersorlutik Oqartussanit

tapiiffigineqarnissamik qinnuteqaat Ilinniartitaanermut Naalackersuisoqarfiup immersugassiaa atorlugu immersugaq nassiunneqassaaq.

Imm. 3. Qinnuteqarnermi immersugassaq elektroniskimik immersorneqassaaq toqqorneqarluni, naqinneqarluni atsiorsinnarlugulu angajoqqaatut oqartussaasunit ilinniartup kommunerisaani ilinniartitaanermut ingerlatsivimmut nassiunneqassalluni. Qinnuteqaammut ilanngussatut makku ilanngunneqassapput:

- 1) Efterskolip ilinniartup ilinniartunngorsinnaaneraniq nalunaarutaa.
- 2) Ilaqutariinnit attaveqaataasartussanit uppersarsaat atsiugaq, tak. § 15.
- 3) Ilinniartoq pillugu atuarfimmitt oqaaseqaat atsiugaq, tak. § 16.
- 4) Isumaginninnermi oqartussaasunit taamatut pisinnaatitaasunit oqaaseqaat atsiugaq, ilinniartoq meeqqat inuusuttullu

ikiorserneqartarnerat pillugu malittarisassat qaqugukkulluunniit atuuttut naapertorlugit angerlarsimaffiup avataanut inissinneqarsimatillugu, imaluunniit inunnut annertuumik innarluutilinnut ikiorsiisarneq pillugu malittarisassanut qaqugukkulluunniit atuuttunut ilaatillugu.

5) Qinnuteqartut § 8, imm. 1, 2 aamma 4-mi taaneqartut aammattaaq akileraaruteqaataasussamik isertitanut uppersarsaatit ilanngullugit nassiutissavaat.

Imm. 4. Qinnuteqarfissami aammattaaq makku ilanngunneqassapput:

- 1) angajoqqaat namminneerlutik angalaneq aaqqissuunniarneraat, aamma
- 2) angalanissamut immikkut kissaateqartoqarnersoq.

Imm. 5. Ilinniartitaanermut ingerlatsiviup tapiiffigineqarnissamik qinnuteqaat aamma ilanngussasat imm. 3-mi taaneqartut assilineri Ilinniartitaanermut Naalackersuisoqarfimmitt nassiutissavai.

**§ 23.** Tapiiffigineqarnissamik qinnuteqaat ilinniartitaanermut ingerlatsivimmit tiguneqareersimassaaq kingusinnerpaamik 1. februar ukiumi efterskolernerup aallartiffissaani. Misissuiartorluni angalanermut tapiiffigineqarnissamik qinnuteqaat ilinniartitsinermut ingerlatsivimmit tiguneqareersimassaaq 1. februar ukioq efterskolimiinnerup aallartiffissaa ukiumik ataatsimik sioqqullugu.

Imm. 2. Tapiiffigineqarnissamik qinnuteqaat ilinniartitaanermut naalackersuisoqarfimmitt imaluunniit ingerlatsisussatut naalackersuisoqarfiup pisinnaatitaanit tiguneqareersimassaaq kingusinnerpaamik 15. februar ukiumi efterskolernissap aallartiffissaani. Misissuiartorluni angalanermut tapiiffigineqarnissamik qinnuteqaat ilinniartitaanermut naalackersuisoqarfimmitt imaluunniit ingerlatsisussatut naalackersuisoqarfiup pisinnaatitaanit tiguneqareersimassaaq kingusinnerpaamik 15. februar ukiup efterskoliimminerup aallartiffissaa ukiumik ataatsimik sioqqullugu.

**§ 24.** Ilinniartitaanermut naalackersuisoqarfik qinnuteqartunut tapiiffigineqarnissamut piumasaqaatinik piviusunnngortitsisunut tapiissuteqassaaq, taamaattoq tak. imm. 2.

Imm. 2. Qinnuteqartut tapiissuteqarnissamut piumasaqaatinik piviusunnngortitsisut aningaasaliissutigineqartunik matussuserneqarsinnaasut qaangerpatigit, ilinniartunut inunnut annertuumik innarluutilinnut ikiorsiisarneq pillugu malittarisassanut qaqugukkulluunniit atuuttunut ilaasunut imaluunniit angerlarsimaffiup avataanut inissitaasunut tapiisoqartassaaq meeqqat inuusuttullu ikiorserneqartarnerat pillugu malittarisassat qaqugukkulluunniit atuuttut naapertorlugit, tamatumalu kingorna tapiiffigineqarsinnaasut sinnerisa akornanni makitsinikkut tapiissutit

tunniuneqassapput. Makitsineq pissaaq kommuninit tamanit qinnuteqartut procentinngorlugu amerlaqatigiittussanngorlugit.

**§ 25.** Ilinniartitaanermut naalakkersuisoqarfiup ukiumi efterskolernerup aallartiffissaani kingusinnerpaamik 15. marts qinnuteqartut nalunaarfigissavai tapiissutit akuerisaasimanersut.

Imm. 2. Ilinniartitaanermut naalakkersuisoqarfiup efterskolit ilinniartoriligassaannut tapiissutit tunniunneqartut taakkualu tunniunneqarnissaannut periutsit pillugit nalunaarfigissavai.

Imm. 3. Ilinniartitaanermut naalakkersuisoqarfiup ilinniartitaanermut ingerlatsivik tapiissutinik qinnuteqaatit nassiussimasai pillugit aalajangiinernik ilisimatissavaa.

Imm. 4. Ilinniartitaanermut naalakkersuisoqarfiup Danmarkimi kalaallit illutaat sumiiffinni attuumassuteqarfigisaanni efterskolini ilinnialersussat pillugit ilisimatissavai.

#### Paasissutissiisussaataaneq

**§ 26.** Angajoqqaatut oqartussaasut pisussaaffigaat ilinniartup efterskolimiinnerminik unitsitsinera, ilinniartimmut allamut nuunna paasissutissallu allat tapiissutisiuarnissamut pingaaruteqartut pillugit ilinniartitaanermut naalakkersuisoqarfimmu nalunaarnissaq.

Imm. 2. Ilinniartitaanermut naalakkersuisoqarfik pisinnaatitaavoq tapiiffigineqarnissamik qinnuteqaatip nalilernissaanut paasissutissat pisariaqartut tamaasa piniarnissaannut, tamatumunnga ilanngullugit isertitat pillugit paasissutissat.

#### Angalanernik aaqqissuussineq

**§ 27.** Ilinniartitaanermut naalakkersuisoqarfiup ilinniartullu kommuunerisaani ingerlatsiviup angajoqqaatut oqartussaasut isumasiorlugit ilinniartut efterskolimut angalanissaasa piareersarnissaat isumagissavaat, taamaattoq tak. Imm. 3 aamma § 29, imm. 1.

Imm. 2. Ilinniartitaanermut naalakkersuisoqarfiup ilinniartut Danmarkimut tikinnerminni isumagineqarnissaat ataqatigiissassavaa.

Imm. 3. Ilinniartunut angerlarsimaffiup avataanut inissitanut tunngatillugu isumaginninnermi oqartussaasup pisinnaatitaaffeqartup angajoqqaatut oqartussaasut isumasiorlugit ilinniartut efterskolimut angalanissaasa piareersarnissaat Danmarkimullu tikinnerminni isumagineqarnissaat isumagissavaat.

**§ 28.** Kalaallit Illuutaata inissisimanermigut ilinniartup efterskolianut attuumassuteqartup angajoqqaatut oqartussaasut isumasioqatigalugit ilinniartup efterskolereernermini angerlamut angalanissaata piareersarnissaa isumagissavaat, taamaattoq tak. Imm. 2 aamma § 29, imm. 2.

Imm. 2. Ilinniartunut angerlarsimaffiup avataanut inissitanut tunngatillugu isumaginninnermi oqartussaasup pisinnaatitaaffeqartup angajoqqaatut oqartussaasut isumasiorlugit ilinniartut efterskolimit angerlarnissaat isumagissavaa.

**§ 29.** Angajoqqaatut oqartussaasut namminneerlutik ilinniartup efterskoliliarnissaanik



piareersaallutillu isumaginnikkumasut, kommunimi ilitsersuisoqarfik aamma ilinniartitaanermut naalakkersuisoqarfik tamanna pillugu sioqqutsilluarlutik ilisimatissavaat, kingusinnerpaamik aallarnissaq qaammatinik tallimanik sioqqullugu.

Imm. 2. Angajoqqaatut oqartussaasut namminneerlutik ilinniartup efterskolimeereeruni angerlarnissaanik piareersaallutillu isumaginnikkumasut, Kalaallit Illuutaat tamanna pillugu sioqqutsilluarlutik ilisimatissavaat, kingusinnerpaamik angerlamut aallarnissaq qaammatinik tallimanik sioqqullugu.

#### Angalanermut aningaasartuutinik utertitsineq

**§ 30.** Angajoqqaatut oqartussaasut ilinniartup efterskolimut efterskolimiillu angalaneranik isumaginnittut, Ilinniartitaanermut naalakkersuisoqarfimmit bilitsimut akikinnerpaamut, allangortinneqarsinnaangitsumut sillimatitaqanngitsumullu aningaasartuutitik uppersarsaasikkat utertillugit akilertissinnaavaat. Aningaasartuutit ilinniartumut namminermut angerlarsimaffiup Københavnillu akornanni angalanermut, kiisalu Danmarkimi aqqummut akikinnerpaamut aningaasartuutitut naatsorsorneqassapput.

Imm. 2. Bilitsi akikinnerpaaq imaluunniit allangortinneqarsinnaangitsoq atorneqanngippat, utertoorigineqarsinnaapput ullormi angalaffimmi bilitsip allangortinneqarsinnaangitsup akia angalanerulluunniit akikinnerpaap nalinga.

Imm. 3. Angajoqqaat Kalaallit Nunaanni mittarfeqarfimmut qaninnermut namminneerlutik angallassigunik aningaasartuutitik namminneq akilissavaat.

**§ 31.** Timmisartumut bilitsit suliarereernerisa kingorna allannguinermi aningaasartuutaanerujunnartunut aningaasartuutit angajoqqaanit akilerneqassapput, tamanna angajoqqaatut oqartussaasut angalanermut kissaatinik allannguinerannik peqquteqarpat.

#### Tapit tunniunneqartarnerat

**§ 32.** Efterskolimiinnermut tapit, tak. §§ 7 aamma 8, efterskolimut pineqartumut akilerneqassapput.

Imm. 2. Tapisianik akiliisarneq unitsinneqassaaq efterskolimiinneq unitsinneqarpat, taamaattoq tak. § 18, imm. 1.

#### Maalaarnissamut periarfissat

**§ 33.** Tapit pillugit aalajangiinerit ingerlatsinikkut oqartussaasumut allamut maalaarutigineqarsinnaanngillat.

Atuuttuulerneramik, ikaarsaariarnermi atorunnaarsitsinermillu aalajangersakkat

§ 34. Nalunaarut atuuttuulissaaq 1. januar 2014 ukiumiillu atuarfiusumit 2014-2015-imiit atuutilissalluni.

Imm. 2. Ilutigisaanik atorunnaarsinneqarpoq Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat nr. 14, 3. september 2009-meersoq.

Imm. 3. Imm. 2 apeqquataatinnagu Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat nr. 14, 3. september 2009-meersumi § 7 naapertorlugu tapiissutit tunniunneqarsimasut ukiup atuarfiusup 2015-imi naanissaanut atuutissapput.

Namminersorlutik Oqartussat, 23. december 2013

Nick Nielsen

/

Mikael Kristensen